

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 7/8

10 փետրվարի 2017թ.

Քննարկվեց Ա/Ձ Կիմա Արզումանյանի գանգատը ՀՀ ԿԱ ՊԵԿ Սյունիքի տարածաշրջանային մաքսատան պետի 18.11.2016թ. թիվ 54 որոշման դեմ:

Ա/Ձ Կիմա Արզումանյանի գանգատում բերված փաստարկները.

Ա/Ձ Կիմա Արզումանյանը հայտնում է, որ 2016թ. նոյեմբերի 16-ին ՀՀ ԿԱ ՊԵԿ Սյունիքի տարածաշրջանային մաքսատնից ստացել է ծանուցագիր կից թիվ 36 որոշումով, համաձայն որի 2016թ. սեպտեմբեր ամսվա մեկ հատ վիճակագրական տվյալ սխալ ներկայացնելու պատճառով ստացել է նախազգուշացում:

2016թ. նոյեմբերի 25-ին ստացել է համանման ծանուցագիր կից թիվ 54 որոշումով, համաձայն որի նույն սխալը թույլ տալով հոկտեմբեր ամսվա վիճակագրական հաշվետվության մեջ ՀՀ վարչական իրավախախտումների վերաբերյալ օրենսգրքի 254 հոդվածով և 169² հոդվածի համաձայն որոշվել է սահմանել տուգանք 50.000 դրամի չափով: Հոկտեմբեր ամսվա հաշվետվությունը ուղարկվել է սահմանված ժամկետում մինչև նոյեմբերի 10:

Փաստորեն առաջին ծանուցագիրը ստանալուց հոկտեմբեր ամսվա վիճակագրական տվյալներն արդեն իսկ ուղարկված են եղել:

Ա/Ձ Կիմա Արզումանյանը խնդրում է հաշվի առնելով վերոգրյալը թիվ 54 որոշումը վերանայել:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ Սյունիքի տարածաշրջանային մաքսատան պետի 31.10.2016թ. թիվ 36 որոշմամբ 2016թ. սեպտեմբեր ամսվա մեկ հատ վիճակագրական տվյալը սխալ ներկայացվելու համար ղեկավարվելով Վարչական իրավախախտումների վերաբերյալ ՀՀ օրենսգրքի 169²-րդ հոդվածի դրույթներով Ա/Ձ Կիմա Արզումանյանը նախազգուշացվել է:

Այնուհետև, ՀՀ ԿԱ ՊԵԿ Սյունիքի տարածաշրջանային մաքսատան պետի կողմից 18.11.2016թ. կայացվել է թիվ 54 որոշումը, որով Ա/Ձ Կիմա Արզումանյանի կողմից 2016թ. հոկտեմբեր ամսվա երկու վիճակագրական հաշվետվություններից մեկը սխալ ներկայացվելու համար ղեկավարվելով Վարչական իրավախախտումների վերաբերյալ ՀՀ օրենսգրքի 169²-րդ հոդվածի դրույթներով Ա/Ձ Կիմա Արզումանյանը ենթարկվել է վարչական պատասխանատվության՝ գումարով 50.000 դրամի չափով:

Սույն գործում առկա ապացույցները վկայում են այն մասին, որ 2016թ. սեպտեմբեր ամսվա մեկ հատ վիճակագրական տվյալը սխալ ներկայացվելու վերաբերյալ Ա/Ձ Կիմա Արզումանյանը ծանուցվել է 2016թ. նոյեմբերի 16-ին: Այսինքն, 2016թ. սեպտեմբեր ամսվա մեկ հատ վիճակագրական տվյալը սխալ ներկայացվելու

վերաբերյալ Ա/Ձ Կիմա Արզումանյանը ծանուցվել է այն ժամանակ, երբ նրա կողմից արդեն իսկ ներկայացված են եղել 2016թ. հոկտեմբեր ամսվա վիճակագրական հաշվետվությունները: Ընդ որում, վիճարկվող որոշմամբ Ա/Ձ Կիմա Արզումանյանը վարչական պատասխանատվության է ենթարկվել 2016թ. հոկտեմբեր ամսվա երկու վիճակագրական հաշվետվություններից մեկը սխալ ներկայացվելու, այսինքն՝ սեպտեմբեր ամսվա հաշվետվությունում թույլ տրված սխալը կրկնելու համար:

Հարկ է նշել, որ Վարչական իրավախախտումների վերաբերյալ ՀՀ օրենսգրքի 169²-րդ հոդվածի համաձայն՝ իրավաբանական անձանց, օտարերկրյա իրավաբանական անձանց՝ ՀՀ տարածքում գործող առանձնացված ստորաբաժանումների, պետական և տեղական ինքնակառավարման մարմինների, հիմնարկների պաշտոնատար անձանց, անհատ ձեռնարկատերերի կողմից պետական վիճակագրական հաշվետվությունները և պետական վիճակագրական դիտարկումներին վերաբերող այլ փաստաթղթերը չներկայացնելը կամ սահմանված կարգի խախտումով (սահմանված ժամկետների կամ ամբողջ ծավալի խախտումներով կամ աղավաղումներով) ներկայացնելը՝ առաջացնում է նախազգուշացում կամ տուգանքի նշանակում՝ սահմանված նվազագույն աշխատավարձի քսանապատիկի չափով:

«Ապրանքների փոխադրման հաշվառման վիճակագրական ձևը» սահմանված է ՀՀ կառավարության 23.04.2014թ. թիվ 447-Ն որոշման հավելված թիվ 2-ով: Սակայն նշված վիճակագրական ձևի լրացման կարգը որևէ իրավական ակտով սահմանված չէ:

Տվյալ դեպքում 2016թ. սեպտեմբեր ամսվա վիճակագրական ձևը սխալ ներկայացվելու վերաբերյալ Ա/Ձ Կիմա Արզումանյանին ավելի վաղ ծանուցվելու դեպքում նրա կողմից նույն խախտումը չէր կատարվի նաև հոկտեմբեր ամսվա վիճակագրական ձևը ներկայացնելիս, ինչի արդյունքում կբացառվեր Ա/Ձ Կիմա Արզումանյանին նույն խախտման համար կրկին անգամ վարչական պատասխանատվության ենթարկելու հնարավորությունը: Այսինքն, վիճակագրական ձևի լրացման կարգի բացակայությամբ պայմանավորված սեպտեմբեր ամսվա վիճակագրական ձևը սխալ լրացվելու վերաբերյալ Ա/Ձ Կիմա Արզումանյանին պետք է ծանուցվեր մինչև հոկտեմբեր ամսվա վիճակագրական ձևի ներկայացնելը: Հակառակ դեպքում տեղի ունեցածում, ըստ էության, Ա/Ձ Կիմա Արզումանյանի մեղքը բացակայում է: Ընդ որում հարկ է նշել նաև, որ 2016թ. սեպտեմբեր ամսվա վիճակագրական ձևը Ա/Ձ Կիմա Արզումանյանի կողմից սխալ ներկայացվելու վերաբերյալ տեղեկատվությունը ՀՀ ԿԱ պետական եկամուտների կոմիտեի կողմից Սյունիքի տարածաշրջանային մաքսատանը տրամադրվել է դեռևս 18.10.2016թ.-ին:

Ելնելով վերոգրյալից՝ Հանձնաժողովը գտնում է, որ գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Բեկանել ՀՀ ԿԱ ՊԵԿ Սյունիքի տարածաշրջանային մաքսատան պետի 18.11.2016թ. թիվ 54 որոշումը և կարճել գործը:

Հանձնաժողովի նախագահ՝


Վ. Մ. ԽՈՎՀԱՆՆԻՍՅԱՆ

